

漢魏六朝百三家集

漢東

第十四冊

蔡中郎

...

上海圖書館藏  
PDF

蔡中郎集題詞

董卓狼戾賊臣折節名士陳留蔡中  
郎時已六十許人令稱疾堅臥偃蹇  
遇害不猶愈昔日死洛陽獄乎勉強  
受官侍中封侯噫嘆之下身名並隕  
雖王司徒輕戮善人識者知其不長

然周歷三臺鼓琴贊事杜欽谷永之  
謂終不能爲中郎解也余揣其徒朔  
方遯江海囚形毀貌不覩天日幾十  
五年驟登大官隆遇待非不欲奮其  
拳拳之忠補益國家當日公卿滿朝  
栖遲危亂金章赤芾豈獨中郎但識

不鑒於比匪謀不出於討賊噤口牢  
獄愛莫能助伯喈曠世逸才余獨傷  
其讀春秋未盡善耳漢史未成願就  
黥劓子長腐刑之志也設竟其意卽  
不如子長豈出孟堅下哉若家門清  
白三世同居却五侯之招陳六事之

本憂心虹蜺抵觸禁近抱子政之悃  
幅蹈京房之禍患又班生所望景先  
逝矣

婁東張溥題

蔡中郎集目錄

卷之一

賦

述行賦

有序

漢津賦

協和婚賦

檢逸賦

協初賦

青衣賦

短人賦有序

瞽師賦

又

筆賦

琴賦

又

又

彈碁賦

又

團扇賦

傷故乘賦

蟬賦

疏

陳政要七事疏

幽冀刺史久闕疏

上漢書十意疏

爲陳畱縣上孝子狀

表



上始加元服與羣臣上壽表

薦皇甫規表

薦太尉董卓表

讓高陽侯印綬符策表

再讓高陽侯印綬符策表

讓尚書乞在閒冗表

巴郡太守謝表

尚書詰狀自陳表

表賀錄換誤上章謝罪

辭金龜紫紱表

書

與何進薦邊讓書

徙朔方報楊復書

徙朔方報羊月書

辭郡辟讓申屠蟠書

與袁公書

又與人書

又與人書

論

明堂月令論

正交論

銘論

桓彬論

議

諫伐鮮卑議

厯數議

宗廟迭毀議

答齋議

和熹鄧后諡議

朱公叔諡議

對問

答詔問災異八事

封事

設論

釋誨

月令問答

連珠

廣連珠

頌

東巡頌

有序

南巡頌

胡廣黃瓊頌

京兆樊惠渠頌

陳畱太守行小黃縣頌

考城縣頌

祖德頌 有序

麟頌

五靈頌

贊

太尉陳公贊

焦君贊

琴贊

卷之二

箴

# 原书缺页

# 原书缺页



太尉汝南李公碑

太尉楊公碑

司空文烈侯楊公碑

漢太尉楊公碑

文烈侯楊公碑

司空房楨碑

司空袁逢碑

荊州刺史庾侯碑

朱公叔墳前石碑

陳畱太守胡公碑

太守胡公碑

陳太邱碑

陳太邱廟碑

文範先生陳仲弓碑

郭有道林宗碑

貞節先生范史雲碑

彭城姜伯淮碑

翟先生碑

汝南周巨勝碑

處士圈叔則碑

光武濟陽宮碑

王子喬碑

伯夷叔齊碑

九疑山碑

陳畱索昏庫上里社碑

琅邪王傅蔡公碑

立文先生李子材碑

郡掾史張立祠堂碑

袁滿來墓碑

童幼胡根碑

真定直父碑

靈表

太傅胡公夫人靈表

司徒袁公夫人馬氏靈表

誄

濟北相崔君夫人誄

神誥

漢交趾都尉胡夫人黃氏神誥

哀讚

議郎胡公夫人哀讚

祝辭

遷都告廟文

九祝辭

祝社文

祖餞祝文

禡文

弔文

弔屈原文

文

篆勢

隸勢

九惟文

詩

飲馬長城窟行

答對元式詩

答卜元嗣詩

翠鳥

附錄

本傳

蔡中郎集目錄終

蔡中郎集卷之一

漢陳畱蔡邕著

明太倉張溥評

賦

述行賦

有序

延熹二年秋霖雨逾月是時梁冀新誅而徐璜左悺五侯擅貴於其處又起顯明苑於城西人徒凍餓不得其命者甚衆白馬令李雲以直言死鴻臚陳君以救雲抵罪璜以余能鼓琴自朝



廷敕陳畱郡守遣余到偃師病不前得歸心憤  
此事遂託所過述而成賦、

余有行於京洛兮、邁淫雨之經時、塗迤邐其蹇  
連兮、潦汙滯而爲災、馬桀蹠而不進兮、心鬱悒  
而憤思、聊弘慮以存古兮、宣幽情而屬詞、久余  
宿於大梁兮、誚無忌之稱神、哀晉鄙之無辜兮、  
忿朱亥之篡軍、厯中牟之舊城兮、憎佛肸之不  
臣、問甯越之裔胄兮、藐髣髴而無聞、經圃田而  
瞰此境兮、晤衛康之封疆、迄管邑而增感歎兮、

愠叔氏之啟商過漢祖之所隘兮。弔紀信於滎陽。降虎牢之曲陰兮。路邱墟以盤縈。勤諸侯之遠戍兮。侈申子之美城。稔濤塗之復惡兮。陷夫人以大名。登長坂以凌高兮。陟蔥山之崑崙。建撫體而立洪高兮。經萬世而不傾。迴峭峻以降阻兮。小阜寥其異形。岡岑紆以連屬兮。谿谷負其杳冥。迫嵯峨以乖邪兮。廓巖壑以崢嶸。攢械樸而雜榛楛兮。被浣濯而羅布。薶蒺藿與臺菌兮。緣層崖而結莖。行遊目以南望兮。覽太室之

威靈顧大河於北垠兮。瞰洛汭之始并。追劉定  
之攸儀兮。美伯禹之所營。悼太康之失位兮。愍  
五子之歌聲。尋修軌以增舉兮。邈悠悠之未央。  
山風泊以飈涌兮。氣燥燥而厲涼。雲鬱術而四  
塞兮。雨濛濛而漸唐。僕夫疲而劬瘁兮。我馬虺  
頽以立黃。格莽邱而稅駕兮。陰曠曠而不陽。哀  
衰周之多故兮。眺瀕隈而增感。忿子帶之淫逸  
兮。唁襄王於壇坎。悲寵嬖之爲梗兮。心惻愴而  
懷燥。乘舫舟而泝湍流兮。浮清波以橫厲。想宓

妃之靈光兮。神幽隱以潛翳。實熊耳之泉液兮。  
總伊瀍與澗瀨。通渠源於京城兮。引職貢乎荒  
裔。操吳榜其萬艘兮。充王府而納最。濟西溪而  
容與兮。息鞏都而後逝。愍簡公之失師兮。疾子  
朝之爲害。立雲黯以凝結兮。集零雨之溱溱。路  
阻敗而無軌兮。塗瀟灑而難遵。率陵阿以登降  
兮。赴偃師而釋勤。壯田橫之奉首兮。義二士之  
夾墳。佇淹畱以候霽兮。感憂心之殷殷。并日夜  
而遙思兮。宵不寐以極晨。候風雲之體勢兮。天

牢湍而無文。彌信宿而後闕兮、思逶迤以東運  
見陽光之顥顥兮、懷少弭而有欣、命僕夫其就  
駕兮、吾將往乎京邑、皇家赫而天居兮、萬方徂  
而並集、貴寵扇以彌熾兮、僉守利而不戢前車、  
覆而未遠兮、後乘驅而競入、窮變巧於臺榭兮、  
民露處而寢濕、清嘉穀於禽獸兮、下糠粃而無  
粒、弘寬裕於便辟兮、糾忠諫其駸急、懷伊呂而  
黜逐兮、道無因而獲入、唐虞眇其旣遠兮、常俗  
生於積習、周道鞠爲茂草兮、哀正路之日忽、觀

風化之得失兮、猶紛掌其多違、無亮采以匡世  
兮、亦何爲乎此畿、甘衡門以甯神兮、詠都人而  
思歸、爰結蹤而迴軌兮、復邦族以自綏、亂曰跋  
涉遐路、艱以阻兮、終其永懷、窘陰雨兮、厯觀羣  
都、尋前緒兮、考之舊聞、厥事舉兮、登高斯賦、義  
有取兮、則善戒惡、豈云苟兮、翩翩獨征、無儔與  
兮、言旋言復、我心胥兮、

漢津賦

夫何大川之浩浩兮、洪流淼以玄清、配名位乎

天漢披厚土而載形、登源自乎嶓冢、引漾澧而  
東征、納陽谷之所吐兮、兼漢沔之殊名、總畎澮  
之羣液兮、演西土之陰精、遇曼山以左迴兮、遊  
襄陽而南縈、切大別之東山兮、與江湘乎通靈  
嘉清源之體勢兮、澹澶澶以安流、鱗甲育其萬  
類兮、蛟龍集以嬉遊、明珠胎於靈蚌兮、夜光潛  
乎玄洲、雜神寶其充盈兮、豈魚龜之足收、於是  
遊目騁觀、南援三州、北集京都、上控隴坻、下接  
江湖、導財運貨、懋遷有無、既乃風飈蕭瑟、勃焉

並興陽侯沛以奔騫，洪濤涌而沸騰，願乘流以  
上下，窮滄浪乎三澨，覩朝宗之形兆，瞰洞庭之  
交會。

協和婚賦

惟性情之至好，歡莫偉乎夫婦，受精靈之造化，  
固神明之所使，事深微以玄妙，實人倫之端始，  
考邃初之原本，覽陰陽之綱紀，乾坤和其剛柔，  
艮兌感其晦腓，葛覃恐其失時，標梅求其庶士，  
唯休和之盛代，男女得乎年齒，婚姻協而莫違，



播欣欣之繁祉，良辰旣至，婚禮以舉。二族崇飾，威儀有序。嘉賓僚黨，祁祁雲聚。車服照路，驂駢如舞。旣臻門屏，結軌下車。阿傅御覽，鴈行蹉跎。麗女盛飾，晔如春華。

檢逸賦

夫何姝妖之媛女，顏煒燁而含榮。普天壤其無儷，曠千載而特生。余心悅於淑麗，愛獨結而未并。情罔寫而無主，意徒倚而左傾。晝騁情以舒愛，夜託夢以交靈。

協初賦

其在近也，若神龍采鱗翼將舉，其既遠也，若披雲緣漢，見織女立若碧山，亭亭監動若翡翠奮其羽，衆色燎照，眎之無主，面如明月，輝似朝日，色若蓮葩，肌如凝密。

青衣賦

金生砂礫，珠出蚌泥，歎茲窈窕，產於卑微，盼倩淑麗，皓齒蛾眉，玄髮光潤，領如螭螭，縱橫接髮，葉如低葵，修長冉冉，碩人其頤，綺袖丹裳，躡蹈

絲扉盤跚蹶蹶坐起低昂和暢善笑動揚朱唇  
都冶媚媚卓蹀多姿精慧小心趨事如飛中饋  
裁割莫能雙追關雎之潔不蹈邪非察其所履  
世之鮮希宜作夫人爲衆女師伊何爾命在此  
賤微代無樊姬楚莊晉妃感昔鄭季平陽是私  
故因錫國厯爾邦畿雖得嫵婉舒寫情懷寒雪  
繽紛充庭盈階兼裳累鎮展轉倒頽昫昕將曙  
鷄鳴相催飭駕趣嚴將舍爾乖矇冒矇冒思不  
可排停停溝側噉噉青衣我思遠逝爾思來追

明月昭昭。當我戶扉。條風狎躡。吹子牀帷。河上  
逍遙。徒倚庭階。南瞻井柳。仰察斗機。非彼牛女  
隔於河維。思爾念爾。怒焉且饑。

短人賦

有序

侏儒短人。樵僂之後。出自外域。戎狄別種。去俗  
歸義。慕化企踵。遂在中國。形貌有部名之侏儒。  
生則象父。唯有晏子。在齊辨勇。匡景拒崔。加刃  
不恐。其餘。疋么。劣厥。僂窶。噓噴。怒語。與人相拒。  
矇昧。嗜酒。喜索。罰舉。醉則揚聲。罵詈。咨口。衆人

患忌難與並侶，是以陳賦引譬比偶，皆得形象，誠如所語，其詞曰：

雄荆雞兮鶩鷺鷓，鶻鳩鷓兮鶻鷓雌，冠戴勝兮啄木兒，觀短人兮形若斯，熱地蝗兮蘆螂且，蜚中蛹兮蠶蠕，視短人兮形若斯，木門閭兮梁上柱，敝鑿頭兮斷柯斧，鞞鞞鼓兮補履樸，脫椎杓兮擣薤杵，視短人兮形如許。

瞽師賦

夫何矇昧之瞽兮，心窮忽以鬱伊，目冥冥而無

睹兮嗟求煩以愁悲，撫長笛以攄憤兮，氣轟鏗而橫飛。

又

何此聲之悲痛，愴然淚以隱惻，類離鴟之孤鳴，起婺婦之哀泣，詠新詩之悲歌，舒滯積而宣鬱。

筆賦

惟其翰之所生，於季冬之狡兔，性精亟以慄悍，體遄迅以騁步，削文竹以爲管，加漆絲之纏束，形調搏以直端，染玄墨以定色，畫乾坤之陰陽。

贊宓皇之洪勲，叙五帝之休德。揚蕩蕩之典文，紀三王之功伐。今表八百之肆觀，傳六經而綴百氏兮。建皇極而敘彞倫，綜人事於晻昧兮。贊幽冥於明神，象類多喻，靡施不協。上剛下柔，乾坤之位也。新故代謝，四時之次也。圓和正直，規矩之極也。立首黃管，天地之色也。

琴賦

爾乃言求茂木，周流四垂。觀彼椅桐，層山之陂。丹華煒燁，綠葉參差。甘露潤其末，涼風扇其枝。

鸞鳳翔其顛，玄鶴巢其岐。考之詩人，琴瑟是宜。  
爰制雅器，協之鍾律。通理治性，恬淡清溢。爾乃  
清聲發兮，五音舉。韻宮商兮，動角羽。曲引興兮，  
繁絃撫。然後哀聲既發，秘弄乃開。左手抑揚，右  
手徘徊。指掌反覆，抑案藏摧。於是繁絃既抑，雅  
韻乃揚。仲尼思歸，鹿鳴三章。梁甫悲吟，周公越  
裳。青雀西飛，別鶴東翔。飲馬長城，楚曲明光。楚  
姬遺歎，鷄鳴高桑。走獸率舞，飛鳥下翔。感激絃  
歌，一低一昂。



又

間關九絃，出入律呂，屈伸低昂，十指如雨。

又

於是歌人恍惚以失曲，舞者亂節而忘形。哀人塞耳以惆悵，馘馬蹠足以悲鳴。

彈碁賦

榮華灼爍，萼不韡韡。於是列象雕華，逞麗豐腹。歛邊中隱，四企輕利。調博易使，騁馳然後。柢掣兵，碁夸驚，或風颺波動，若飛若浮。不遲不疾，如

行如畱，放一弊六，功無與儔。

又

夫張局陳棋，取法武備，因嬉戲以隸業，託歡娛以講事。設茲矢石，其夷如破；采若錦繡，平若停水。肌理光澤，滑不可屢；乘色行巧，據險用智。

團扇賦

裁帛製扇，陳象應矩。輕徹妙好，其轉如羽。動角揚徵，清風逐暑。春夏用事，秋冬潛處。

傷故栗賦

蔡中良集 卷之一  
人有折蔡氏祠前栗者，故作斯賦。

樹南方之嘉木兮，於靈宇之前庭。通二門以征  
行兮，夾堦除而列生。彌霜雪之不彫兮，當春夏  
而滋榮。因本心以誕節兮，凝青蘂之綠英。形猗  
猗以豔懋兮，似碧玉之精明。何根莖之豐美兮，  
將蕃熾以悠長。遇禍賊之災人兮，嗟夭折以摧  
傷。

蟬賦

白露淒其下降，秋風肅以晨興。聲嘶嗌以沮敗，

體枯燥以冰凝、雖期運之固然、獨潛類乎大陰、  
要明年之中夏、復長鳴而揚音、



疏

陳政要七事疏

臣伏讀聖旨。雖周成遇風。訊諸執事。宣王遭旱。密勿祇畏。無以或加。臣聞天降災異。緣象而至。霹靂數發。殆刑誅繁多之所生也。風者天之號令。所以教人也。夫昭事上帝。則自懷多福。宗廟致敬。則鬼神以著。國之大事。實先祀典。天子聖躬。所當恭事。臣自在宰府。及備朱衣。迎氣五郊。而車駕稀出。四時致敬。屢委有司。雖有解除。猶

爲疎廢。故皇天不悅。顯此諸異。洪範傳曰。政悖  
德隱。厥風發。屋折木。坤爲地道。易稱安貞。陰氣  
憤盛。則當靜反動。法爲下叛。夫權不在上。則震  
蕩物。政有苛暴。則虎狼食人。貪利傷民。則蝗蟲  
損稼。去六月二十八日。太白與月相迫。兵事惡  
之。鮮卑犯塞。所從來遠。今之出師。未見其利。上  
違天文。下逆人事。誠當博覽衆議。從其安者。臣  
不勝憤懣。謹條宜所施行七事表左。

一事。明堂月令。天子以四立。及季夏之節。迎五

帝於郊。所以導致神氣。祈福豐年。清廟祭祀。追往孝敬。養老辟雍。示人禮化。皆帝者之大業。祖宗所祇奉也。而有司數以藩國疎喪。宮內產生。及吏卒小汗。屢生忌故。竊見南郊齋戒。未嘗有廢。至於他祀。輒興異議。豈南郊卑而他祀尊哉。孝元皇帝策書曰。禮之至敬。莫重於祭。所以竭心親奉。以致肅祇者也。又元和故事。復申先典。前後制書。推心懇惻。而近者以來。更任太史。忘禮敬之大。任禁忌之書。拘信小故。以虧大典。禮



妻妾產者齋則不入側室之門。無廢祭之文也。所謂宮中有卒三月不祭者。謂士庶人數堵之室。共處其中耳。豈謂皇居之曠。臣妾之衆哉。自今齋制宜如故典。庶答風霆災妖之異。

二事臣聞國之將興。至言數聞。內知己政。外見民情。是故先帝雖有聖明之資。而猶廣求得失。又因災異。援引幽隱。重賢良。方正敦朴有道之選。危言極諫。不絕於朝。陛下親政以來。頻年災異。而未聞特舉博選之旨。誠當思省。述修舊事。

使抱忠之臣。展其狂直。以解易傳政悖德隱之  
言。

三事。夫求賢之道。未必一塗。或以德顯。或以言  
揚。頃者立朝之士。曾不以忠信見賞。恆被謗訕  
之誅。遂使羣下結口。莫圖正辭。郎中張文前獨  
盡狂言。聖聽納受。以責三司。臣子曠然。衆庶解  
悅。臣愚以爲宜擢文右職。以勸忠謇。宜聲海內。  
博開政路。

四事。夫司隸校尉諸州刺史。所以督察姦枉分

別白黑者也。伏見幽州刺史楊熹、益州刺史龐芝、涼州刺史劉虔，各有奉公疾姦之心。熹等所糾其效尤多，餘皆枉撓，不能稱職。或有抱罪懷瑕，與下同疾，綱網弛縱，莫相舉察。公府臺閣亦復默然。五年制書議遣八使，又令三公謠言奏事。是時奉公者欣然得志，邪枉者憂悸失色。未詳斯議，所因寢息。昔劉向奏曰：夫執狐疑之計者，開羣枉之門，養不斷之慮者，來讒邪之口。今始聞善政，旋復變易，足令海內測度朝政，宜追

定八使。糾舉非法。更選忠清。平章賞罰。三公歲盡。差其殿最。使吏知奉公之福。營私之禍。則衆災之原。庶可塞矣。

五事。臣聞古者取士。必使諸侯歲貢。孝武之世。郡舉孝廉。又有賢良文學之選。於是名臣輩出。文武並興。漢之得人。數路而已。夫書畫辭賦。才之小者。匡國理政。未有其能。陛下卽位之初。先涉經術。聽政餘日。觀省篇章。聊以游意。當代博奕。非以爲教化取士之本。而諸生競利。作者鼎

蔡中郎集 卷之一  
三  
沸。其高者頗引經訓風喻之言。下則連偶俗語。有類俳優。或竊成文。虛冒名氏。臣每受詔於盛化門。差次錄第。其未及者。亦復隨輩皆見拜擢。既加之恩。難復收改。但守俸祿於義已弘。不可復使理人及仕州郡。昔孝宣會諸儒於石渠。章帝集學士於白虎。通經釋義。其事優大。文武之道。所宜從之。若乃小能小善。雖有可觀。孔子以爲致遠則泥。君子固當志其大者。

六事墨綬長吏職典理人皆當以惠利爲績。日

月爲勞。褒責之科。所宜分明。而今在任。無復能省。及其還者。多召拜議郎郎中。若器用優美。不宜處之冗散。如有釁故。自當極其刑誅。豈有伏罪懼考。反求遷轉。更相倣效。臧否無章。先帝舊典。未嘗有此。可皆斷絕。以覈真僞。

七事伏見前一切以宜陵孝子爲太子舍人。臣聞孝文皇帝制喪服三十六日。雖繼體之君。父子至親。公卿列臣。受恩之重。皆屈情從制。不敢踰越。今虛僞小人。本非骨肉。旣無幸私之恩。又

無祿仕之實。惻隱思慕。情何緣生。而羣聚山陵。假名稱彜。行不掩心。義無所依。至有姦執之人。通容其中。恆思皇后祖載之時。東郡有盜人妻者。亡在孝中。本縣追捕。乃伏其辜。虛偽雜穢。難得勝言。又前至得拜。後輩被遺。或經年陵次。以暫歸。見漏。或以人自代。亦蒙寵榮。爭訟怨恨。凶凶道路。太子官屬。宜搜選令德。豈有但取邱墓凶醜之人。其爲不祥。莫與大焉。宜遣歸田里。以明詐僞。

幽冀刺史久缺疏

臣聞國家置官以職建名。臣愚淺小才竊假階級。官以議爲名。職以郎爲貴。智淺謀陋。無所獻替。夙夜寤歎。憂悸怛惕。臣邕頓首死罪。伏見幽州奕騎。冀州強弩。爲天下精兵。國家贍伏。四方有事。軍師奮攻。未嘗不辦於二州也。頃者以來。連年饑荒。穀價一斛至六七百錢。故護烏桓校尉夏育出征鮮卑。無功而還。士馬死傷者萬數。弓兵散亡幾盡。生民之本。守禦之備。無一可恃。



百姓元元流離溝壑寇賊輩起莫能禁討長吏  
寒心朝不守夕卒有他方之急則役之不可驅  
使自爲寇虜則誅之不可擒制豈非可憂之難  
三府選幽冀二州刺史踰月不定臣恠問其故  
云避三五十一州有禁當取二州而已二州之  
中少素有威名之士或拘限歲年不應選用狐  
疑遲淹兩州空懸萬里蕭條無所管繫每冀州  
長吏初除詔書治嚴不過五日今者刺史數旬  
不選誠非其理愚以爲三五之禁禁之薄者以

陛下威靈申明。禁令在任之人。豈不戒懼而當坐。設三互。自生留闕邪。昔孝景時。梁人韓安國坐事被刑。起徒中爲內史。武帝患東越數反。拜故待詔會稽朱買臣。宣帝時。患冀州有盜賊。故京兆尹張敞有罪逃命。上使使就家召爲冀州刺史。安國徒隸。買臣郡民。皆還治其國。張敞亡命。擢授劇州。豈顧三互。拘官簿得救時之便也。卒獲其用。遺芳不滅。此先帝不誤已然之事。三公明知二州之要。尤宜揀選。當越禁取能。以救

時弊。而不顧爭臣之義。苟避輕微之科。竊見日月拘忌。選旣稽滯。又未必審得其人。則二部蠢蠢。將爲憂念。願陛下上則先帝用三臣之法。蠲除近禁。其諸州刺史器用可換者。無拘日月。三互以差厥中。臣悽悽瞽言。惟陛下畱神再省三

省

伏見幽冀舊壤。鎧馬所出。比年兵饑。漸至空耗。今者百姓虛縣。萬里蕭條。闕職經時。吏人延屬。而三府選舉。踰月不定。臣經怪其事。而論者云。避三五十一州有禁。當取二州而已。又二州之士。或復限以歲月。狐疑遲淹。以失事會。愚以爲三五之禁。禁之薄者。今但申以

威靈明其憲令、在任之人、豈不戒懼、而當坐  
設三五、自生畱闕邪、昔韓安國起自徒中、朱  
買臣出於幽賤、並以才宜還守本邦、又張敞  
亡命、擢授劇州、豈復顧循三五、繼以未制乎。  
三公明知二州之要、所宜速定、當越禁取能、  
以救時敝、而不顧爭臣之義、苟避輕微之科、  
選用稽滯、以失其人、臣願陛下上則先帝、獨  
除近禁、其諸州刺史器用可換者、無拘日月  
三五、以  
差厥中、

### 上漢書十志疏

朔方髡鉗徒臣邕稽首再拜上書皇帝陛下臣  
邕被受陛下寵異大恩、初由宰府、備數典城、以  
親父故依叔父衛尉質時、以尚書召拜中郎、受

詔詣東觀著作，遂與羣儒並拜議郎，沐浴息澤，承答聖問，前後六年，質奉機密，趨走陛下，遂由端右出相外藩，還尹輦轂，旬日之中，登躡上列，父子一門，兼受恩寵，不能輸寫心力，以効絲髮之功，一旦被章，陷沒辜戮，陛下天地之德，不忍刀鋸截首領，得就平罪，父子家屬，徒充邊方，完全軀命，喘息相隨，非臣無狀所敢復望，非臣罪惡所當復蒙，非臣辭筆所能復陳，臣初決罪洛陽，詔獄生出牢戶，顧念元初中，故尚書郎張俊

坐漏泄事。當服重刑。已出轂門。復聽續鞫。詔書  
馳救一等。輸作左校。俊上書謝恩。遂以轉徙。邕  
爲郡縣促遣。迫於吏手。不得頃息。含辭抱悲。無  
由上達。旣到徙所。乘塞守烽。職在候望。憂怖焦  
灼。無心復能操筆成草。致章闕庭。誠知聖朝不  
責臣謝。但懷愚心。有所不竟。臣自在布衣。常以  
爲漢書十志。下盡王莽而止。世祖以來。唯有紀  
傳無續志者。臣所事師故太傅胡廣。知臣頗識  
其門戶。畧以所有舊事與臣。雖未備悉。粗見首

尾積累思惟二十餘年不在其位非外吏庶人  
所得擅述天誘其衷得備著作郎建言十志皆  
當撰錄遂與議郎張華等分受之其難者皆以  
付臣先治律厯以籌算爲本天文爲驗請太師  
田注考校連年往往頗有差舛當有增損乃可  
施行爲無窮法道至深微不可獨議郎中劉洪  
密於用算故臣表上洪與共參思圖牒尋繹度  
數適有頭緒會臣被罪逐放邊野臣竊自痛一  
爲不善使史籍所闕胡廣所校二十年之思中

道廢絕。不得究竟。悽悽之情。猶以結心。不能自  
達。臣初欲須刑竟。乃因縣道。具以狀聞。今年七  
月九日。匈奴攻鹽池縣。其時鮮卑連犯雲中五  
原。一月之中。烽火不絕。不意西夷相與合謀。所  
圖廣遠。恐遂爲變。不知所濟。郡縣咸悄悄不知  
所守。且臣所在孤危。懸命鋒鏑。湮滅土灰。呼吸  
無期。誠恐所懷隨軀腐朽。抱恨黃泉。遂不設施  
輒先顛踣。科條諸志。臣欲刪定者一。所當接續  
者四。前志所無。臣欲著者五。及經典羣書。所宜



摺摭本奏詔書。所當依據。分別首目。并書章左。臣初考逮。妻子迸竄。亡失文書。無所按請。加以。惶怖愁恐。思念荒散。十分不得識一。所識者。又恐謬誤。觸冒死罪。披摠愚情。願下東觀。推求諸奏。參以璽書。補綴遺闕。昭明國體。章聞之後。雖肝腦流離。白骨剖破。無所復恨。惟陛下畱神省察。謹因臨戎長霍園封上。臣頓首死罪。稽首再拜以聞。

爲陳畱縣上孝子狀

臣前到官博問掾史孝行卓異者。臣門下掾申屠夔稱孝子平邱程。未年十四歲。時祖父叔病歿。未抱伏叔尸。號泣悲哀。口乾氣少。喘息纔屬。舅偃哀其羸劣。嚼棗肉以哺之。未見食噓唏。不能吞咽。麥飯寒水間用之。舅偃誘勸。哽咽益甚。是後精美異味。遂不過口。常在柩旁。耳聞叔名。目應以淚。前太守文穆召署孝義童云。以叔未葬。不能至府舍。臣輒核問掾史。邑子殷盛宿彥等辭驗皆合。臣卽召來見。未年十四歲。顏色瘦

小。應對甚詳。臣問樂爲吏否。垂泣求去。白歸喪所。臣爲設食。但用麥飯寒水。不食肥膩。舅本以田作爲事。家無典學者。其至行發於自然。非耳目聞見所做效也。雖成人之年。知禮識義之士。恐不能及。伏唯陛下體因心之德。當中興之運。躬秉萬幾。建用皇極。神紀騁於無方。淑暢洽於羣生。故醕行感時而生。美義因政以出。清風奮揚。休徵誕漫。太平之萌。昭驗已著。臣誠伏見幸甚。臣聞魯侯能孝。命於夷官。張仲孝友。侯在左。

右。周。宣。之。興。實。始。於。此。且。烏。以。反。哺。託。體。太。陽。  
羔。以。跪。乳。爲。贄。國。卿。禽。鳥。之。微。猶。以。孝。寵。况。未。  
稟。純。粹。之。精。爽。立。百。行。之。根。源。其。人。隱。瘁。而。德。  
曜。彌。光。其。族。益。章。臣。不。勝。願。會。使。未。美。昭。顯。本。  
朝。謹。陳。狀。臣。邕。頓。首。

Table with 5 columns and multiple rows of text. The text is extremely faded and illegible. The columns are separated by vertical lines, and the rows are separated by horizontal lines. The overall appearance is that of a scan of a document with very low contrast.

表

上始加元服與羣臣上壽表

伏惟陛下應天淑靈，丁期中興，誕在幼齡，聖姿  
碩義，威儀孔備，俯仰龍光，顏如日星，言稽典謨，  
動蹈規矩，緝熙光明，思齊周成，早智夙就，參美  
顯宗，令月吉日，始加元服，進御幘結，以章天休，  
臣妾萬國，遐邇大小，同喜逸豫，式歌且舞，臣等  
不勝踊躍，鳧藻謹奉生頭酒九鍾，稽首再拜上  
千萬壽，陛下享茲吉福，永守皇極，通遵太和，靖

綏六合，宜民宜人，受祿於天。書曰：一人有慶，兆民賴之。其甯惟末。詩曰：顛顛卬卬，如珪如璋，令聞不忘，萬壽無疆。

薦皇甫規表

臣聞唐虞以師師成，熙周文以濟濟爲甯。區區之楚，猶用賢臣爲寶。衛多君子，季札知其不危。由此言之，忠臣賢士，國家之元龜，社稷之楨固也。昔孝文愠匈奴之生事，思李牧於前代。孝宣忿奸邪之不散，舉張敞於亡命。况在於當時，謙

虛爲罪而可遺棄。臣伏見護羌校尉皇甫規少明經術。道爲儒宗。修身力行。忠亮闡著。出處抱義。皦然不污。藏器林藪之中。以辭徵召之寵。先帝嘉之。羣公歸德。盜發東岳。莫能撓討。卽起家拜爲泰山太守。屠斬桀黠。綏撫熒弱。青兗之郊。迄用康乂。自是以來。方外有事。戎狄猾華。進簡前勲。連見委任。仗節舉麾。威靈盛行。演化凶悍。使爲慤愿。愛財省穡。每有餘資。養士御衆。悅以亡死。論其武勞。則漢室之干城。課其文德。則皇



家之腹心誠宜試用以廣振鷺西靡之美。臣以  
頑愚忝污顯列輒流汗墨不堪之責不勝區區  
執心所見越職瞽言罪當殊死唯陛下畱神省  
察臣邕頓首頓首

薦太尉董卓表

臣某等聞周有流彘之亂而宣王以興漢有昌  
邑之難而中宗以昭由此觀之天生神聖特以  
靖亂整殘丕誕洪業輔佐重臣國之楹棟生應  
期運稟氣山岳是故申伯山甫列於大雅蕭曹

丙魏載於史籍國遭奸臣孽妾制弄主權累葉  
相繼六十餘載火熾流沸浸以不振威移羣下  
福在弄臣海內嗷嗷被其傷毒故大將軍慎侯  
何進盡忠出身圖議盪滌以清季朝執凶遘難  
兵起亂作元舅上卿先寇受害禍至羣辱社稷  
傾危太尉郿侯卓起自東土封畿之外義勇憤  
發旋赴京師先陳便宜列表奸猾羣慝情狀辭  
意激切感物悟靈精兵虎臣承持卓勢奮擊醜  
類漏刻之間靡有孑遺卓聞乘輿已趨河津身

率輕騎長驅邠臯上解國家播越之危下救兆  
民塗炭之禍然後黜廢頑凶爰立聖哲天心聿  
得萬國賴祉及至差功行賞辭多受少近臣幸  
臣一人之封戶至萬數今者受爵十有一人總  
合戶數千不當一封今月七日卓又上書辭疾  
讓位乞就國土上違聖主嘉寵之至下乖羣生  
瞻仰之望非所以褒功賞勲也惟陛下益隆委  
任數加訪問厚其爵賞責以相業之成臣等不  
勝大願

讓高陽侯卬綬符策表

詔制左中卽將蔡邕。今封邕陳畱雍邱高陽鄉侯。下卬綬符策。假限食五百戶。歲五十萬穀。臣稽首受詔。怔營喜懼。精魄播超。恍惚如夢。不敢自信。臣伏惟糠粃小生。學術虛淺。少竊方正。長厯宰府。備數典城。著作東觀。無狀取罪。捐棄朔野。蒙恩徙還。退伏畝畝。復階朝謁。進察憲臺。遂充機密。令守巴郡。還備侍中。車駕西還。執鞭跨馬。及看輪轂。升輿下軫。扶接聖躬。旣至舊京。出

備卽將。中外所疑。對越省闈。羣臣之中。特見褒  
異。訖無雞犬鳴吠之用。常以汗墨。愧負恩寵。誠  
不意悟。猥與公卿以下。錄功受賞。命服金紫。爵  
至通侯。非臣草萊功勞微薄。所當被蒙。臣十四  
世祖。肥如侯佐命高祖。以受爵賞。統嗣曠絕。除  
在匹庶。臣子遺苗裔。復蒙顯封前功。輕重不侔。  
慚惶累息。無心怡甯。唐虞之朝。猶美三讓。臣者  
何人。受而不讓。臣不勝戰悼。林惕。詣闕拜章。上  
所假高陽侯印綬符策。伏受罪誅。臣得微勞。被

受爵邑。光寵榮華。燿熠祖禰。非臣小族陋宗。器量褊狹。所能堪勝。非臣力用勤勞。有所當受。誠無安甯甘悅之情。國憲上行。下不敢逆。苟順恩旨。退省金龜紫紱之飾。非臣容體所當服佩。中讀符策誥戒之詔。非臣才量所能祇奉。歷日彌久。震懼益甚。臣聞高祖受命。元功翊德者。與其天下爵土。故曰使黃河若帶。太山若礪。國以永存。爰及苗裔。夫山河至大。猶謂之小。重功輕賞。如此其至也。是以戰攻之事。大有陷堅破敵。斬

將擐旗之功。小有馘截首級。履傷涉血之難。勤苦軍旅。連年累歲。首如蓬葆。體如漆幹。勞瘁辛苦。如此其重也。以受爵土。誰曰不宜。今者聖朝遷都。應順天人。奔走之役。臣僕職分宜然。臣事輕菽苴。功薄蟬翼。恐史官錄書。臣等在功臣之列。陷恩澤之科。垂名後葉。作戒末嗣。非本朝之德政。御臣之長策。臣是以宵寢晨興。叩膺增歎。心煩慮亂。喘呼息吸。且鷦鷯巢林。不過一枝。鼯鼠飲河。不過滿腹。小人之情。求足而已。臣不勝

大願。

再讓高陽侯印綬符策表

臣忝自參省。資非哲人。藩屏之用。器非殿邦。佐君之才。憂心灼煊。耳目昏冒。忪蒙蔽罔。累息屏氣。臣聞稷契之儔。以德受命。功德靡堪。讓所不如。昔之范正。不亡禮讓。其下化之。春秋采焉。臣雖小醜。不足勗勵。以躡高蹤。以詩人斯亡之戒。觀見符策。君國之誨。兩印雙紱。並在鞶帶。至德元功。器量弘大。猶且踧踖無心。甯止。况臣螻蟻



無功德而散怠茸闖何以居之且晏嬰辭邱殿  
之邑張良辭三萬之戶書籍紀之以爲異美夫  
人君無弄戲之言憲法有誣罔之劾臣不敢違  
戾飭虛以距上旨疑确之誠與神明通謹奉章  
詣闕頓首敢固以請息伏惟畱省

讓尚書乞在閒冗表

臣流離藏竄十有二年陛下應期中興龍飛踐  
祚奸臣嬖孽一時殄盡憎疾臣者隨流埋沒太  
尉郿侯卓收拾洗濯上臣高第補侍御史轉治

書御史。陛下天地之大德，聽納大臣，扶飾文舉，遂用臣邕，充備機密。三月之中，充歷三臺，光榮顯著，非臣愚蔽不才，所當盜竊。非臣碎首糜軀，所能補報。臣邕頓首頓首，死罪死罪。聞世宗之時，田千秋有神明，感動一言，以悟聖聽，昭發上心。故有一日九遷。臣邕草萊小臣，思謀愚淺，生非千秋，職不狎練。加以新來入朝，不更郎署，攝省文書。其猶面牆。陛下統繼大業，委政冢宰，大傳隗以舊典，入錄機密事。尚書令日，殫先輩舊

齒德更上公。僕射允。故司隸校尉。河南尹某。尙書張憲。已歷九列。侍中魯旭。牧守宣藩。剖符數郡。唯臣官位微賤。特單輕匹。此六臣。臣當自知。况於論者。將謂臣何。是以夙夜寤歎。寐息屏營。無顏以居。無心以甯。明時階級。人所勸慕。乞在他署。抱關執鑰。以守漏刻。則臣之心。厭飫足矣。降榮於悴。退顯於進。臣不勝區區疑戒。不敢肅飾。

巴郡太守謝表

臣尚書邕免冠頓首死罪。臣猥以頑闇連值盛時，超自羣吏，八登機密，未及輸力盡心，日下五府舉臣任巴郡太守。陛下不復參論，府舉入奏，驚惶失守，非臣敢安。怔營累息，不知所措。臣邕頓首死罪。知納言任重，非臣所得久忝。今月丁丑，一章自聞，乞在閒冗，抱關執鑰，不意錄符銀青，授任千里，求退得進。後上先遷，爲衆所恠，不合事宜。願乞還詔命，盡力他役，死而後已。臣猥以愚闇，盜竊明時，周旋三臺，充列機衡，出入省

闈登踏丹墀承隨同位與在行列以受酒醴嘉  
幣之賜詔書前後賜石鏡奩禮經素字尚書章  
句白虎議奏合成二百一十二卷及唾壺彈棋  
石枰蓮香瓠子黎錫汁器圍盧諸物誠念及下  
錫惠周至每敕勿謝前後重疊雖父母之於子  
孫無以加此未得因緣有事答稱萬一不意卒  
遷荷受非任臨時自陳未蒙省許慘結屏營蹶  
踏受拜命服銀青光寵休顯上耀祖先下榮昆  
裔誠非所望且巴士土長遠江山修隔頃來未悉

輯睦、劉焉、撫甯有方、柔遠功著、臣以頑蒙、不閑  
職政、宜暢聖化、道遵和風、非臣才力所能供給、  
必以忝辱、煩污聖朝、幸循舊職、當竭肝膽從事、  
筋、絕、骨、破、以、命、繼、之、臣、邕、頓、首、死、罪、

尚書詰狀自陳表

議郎、冀、土、臣、邕、頓、首、再、拜、上、書、皇、帝、陛、下、今、月  
十、三、日、臣、被、尚、書、召、問、臣、以、大、鴻、臚、劉、郃、前、爲  
濟、陰、太、守、臣、屬、吏、張、宛、長、休、百、日、郃、爲、司、隸、又  
託、河、內、郡、吏、李、奇、爲、州、書、佐、及、營、護、故、河、南、尹

羊陟侍御史胡毋班。郤不爲用。致怨之狀。臣懼營怖慄。肝膽塗地。不知死命所在。竊自尋案。實屬宛竒。不及陟班。凡休假小吏。皆非結恨之本。與陟姻家。豈敢申助私黨。如臣父子。欲相傷陷。當明言臺閣。具陳恨狀所緣。內無寸事。而謗書外發。宜以臣對。與郤參驗。臣得以學問。特蒙褒異。執事祕館。操管御前。姓名貌狀。微簡聖心。今年七月。召詣金商門。問以災異。齋詔申旨。誘臣使言。臣實愚戇。惟識忠蓋。出命忘軀。不顧後患。

譏切公卿。內及寵近。區區欲答上問。救恠異。爲  
陛下圖康甯之計而已。預知所言者當必怨臣。  
陛下不念忠臣直言。宜加掩蔽。誹謗卒至。便用  
疑恠。豈不負盡忠之吏哉。每有災異。輒令百官  
各上封事。欲以改政息譴。除凶致吉。而言者不  
蒙延納之福。旋被陷破之禍。羣臣杜口。以臣爲  
戒。誰敢復爲陛下盡忠者乎。臣季父質連見拔  
擢位在上列。臣被蒙恩渥。數見訪問。言事者因  
此欲陷臣父子。破臣門戶。非復發糾姦伏。補益



國家者也。臣年四十有六，孤特一身，前無立男，得盡節王室。託名忠臣，死有餘榮。然恐陛下不復聞至言矣。臣愚以凡冗招致禍患，自臣職耳。臣對問時，質爲下邳相，不聞臣謀。今日橫見逮及，使質恨以衰老白首，隨臣摧沒，并內坑陷。以快言事，厭副其心。誠寃誠痛。陛下仁篤之心，必不忍此。思之未至耳。臣一入牢檻，當爲箠楚所迫趣。飲章辭情，何緣復達。臣死期垂至，冒昧自陳，乞身當辜戮。免質并坐。臣死之日，則生之年。

也、唯陛下加餐、爲百姓自愛、臣邕死罪、

表賀錄換誤上章謝罪

今月十八日、臣以相國兵討逆賊、故河內太守  
王臣等屯陳、破壞、斬獲首級、詣朝堂上賀、臣邕  
奉賀錄、故羽林郎將李參遷城門校尉、而署名  
羽林左監、右衛尉、杜衍在朝堂、而稱不在錄、咎  
在臣不詳、省按使參以亡爲存、衍以存爲亡、錯  
奏、謬錄不可行、侍御史劾臣不敬、當賜刑書、懲  
戒不恪、陛下天地之德、不辱收戮、丙辰詔書、以

一月俸贖罪。臣邕怔營慙怖，屏氣累息，不知所自投處。臣邕頓首死罪。臣不惟石慶數馬之誤，簡忽校讎，不謹之愆。雖見原宥，仰愧先臣。傷肌入骨，不勝忪蒙流汗。臣邕頓首死罪。

書

與何進薦邊讓書

明將軍以申甫之德、當中興之隆、建上將之任、膺秉國之權、妖寇作孽、震驚京師、運籌帷幄、定策廟勝、先擒馬元、歸近之變、天兵致誅、兗豫以清、冀荆用次、雲消席卷、克厭衆心、王室已甯、萬國兆民、莫不賴祉、伏惟幕府初開、博選清英、華髮舊德、並爲元龜、成功立事、莫不畢舉、雖振鷺之集西靡、濟濟之在周庭、無以或加、伏見陳畱

邊讓字文禮。天授逸才。聰明賢知。纂成伐柯。不遠之則。齟齬夙孤。不墜家訓。始任學問。便就大業。閒不遊嬉。初覽諸經。見本知義。尋端極緒。受者不能答其問。章句不能遂其意。詩書易禮。先通大義。業以次舉。衆傳篇章。無術不綜。心通性達。剖纖入冥。口辨辭長。而節之以禮度。安詳審固。守持內定。非禮勿動。非法不言。據狐疑之論。定嫌審之分。經典交至。檢括並合。衆夫嘉焉。莫之能奪。使讓生於先代。在唐虞則元凱之比。當

仲尼則顏冉之亞豈徒世俗之凡偶兼混是非  
講論而已哉。才藝言行卓逸不羣階級名位亦  
宜超然不以常制爲限長幼爲拘若復輩從此  
郡選舉非所以彰瓌璋之高價昭大知之絕明  
也。傳曰。函牛之鼎一旦立之以烹雞多汁則澹  
而不可食少汁則焦而不可熟大器之於小用  
固有所不宜也。邕誠竊恫悵怪此寶鼎未受犧  
牛大羹之和久佐煎熬鬻馘之間願明將軍回  
謀守慮思垂采納就讓疾病所親察之更以屬

缺招延表貢行狀。列於正府。躋之宗伯。納之機密。展其力用。副其器量。夫若以年齒爲嫌。則顏淵不得冠德行之首。子奇不得紀治阿之功。苟能其事。古今一也。密疏特表。及期而行。邦國其昌。邕寢羸匍匐拜寄。不敢須通。

徙朔方報楊復書

昔此徙者。故城門校尉梁伯喜。南郡太守馬季長。或至三歲。近者歲餘。多得旋返。自甘罪戾。不敢慕此。

徙朔方報羊月書

幸得無恙。遂至徙所。自城以西。惟青紫鹽也。

辭郡辟讓申屠蟠書

蟠家貧。傭爲漆工。邕深重蟠。及被州辟。乃辭讓之。

申屠蟠稟氣玄妙。性敏心通。喪親盡禮。幾於毀滅。至行美誼。人所鮮能。安貧樂潛。味道守真。不爲燥濕輕重。方之於邕。以齒則長。以德則賢。

與袁公書

朝夕游談。從學宴飲。酌麥醴。燔乾魚。欣欣焉樂。



在其中矣。

又與人書

家祖居常言客有三當死。夜半蠶時至人室家也。今者一行而犯其兩。

又與人書

邕薄祐早喪二親。年踰三十。鬢髮二色。叔父親之。猶若幼童。陸則對坐。食則比豆。